

Prome minister Evelyn Wever-Croes:

Aruba no ta reconoce ‘Secretario di Estado’ den su Constitucion

Dialuna despues di su reunion cu SE Gobernador di Aruba, Señor Alfonso Boekhoudt, Prome Minister Evelyn Wever-Croes a duna varios declaracion riba diferente topico contestando preguntanan den un entrevista cu nos planta nacional TeleAruba. Un di e preguntanan ricibi ta tocante e topico cu a surgi diadomingo tocante ‘staatssecretaris’. Prome Minister a indica di a tuma nota di esaki y a splica cu Hulanda si conoce e instituto di staatssecretaris.



E staatssecretaris ta na banda di e minister encarga cu cierto cartera y na momento cu e cartera di e minister bira mucho pisa, ta delega e trabounan na e staatssecretaris. Manera ta e caso di e Minister di Relacionnan di Reino y su Secretario di Estado di Relacionnan di Reino. Aruba ta deal direct cu e Secretario di Estado di Relacionnan di Reino y no cu e Minister di Relacionnan di Reino. Na

Hulanda, Prome Minister a sigui splica, cu staatssecretaris ta un posicion politico mesos cu e minister apunta door di Parlamento y cu pa medio di un mocion di desconfiansa por kit’e tambe.

Na Aruba, nos no conoce e posicion di staatssecretaris den nos sistema di gobernacion y no ta hancra den nos leynan. Den nos leynan tin un referencia na e palabra

‘staatssecretaris’ dos caminda. Den artikel III.17 ta referi na staatssecretaris pero esaki ta un error. Prome Minister a splica cu na prome instante, tempo cu Aruba a traha su Constitucion na aña 1985, bou iniciativa di Partido MEP, tawata plania pa bin cu e posicion pa secretario di estado pa comparti e peso di trabou cu e minister. Partido AVP no a bay di acuerdo cu esaki cu e pensamiento cu MEP a bin cu

esaki pa acomoda su hendenan.

AVP, pa e motibo aki, a saca e staatssecretaris for di Constitucion. Sinembargo, pa motibo di un descuido of un trabou slordig, e palabra staatssecretaris no a wordo saca for di e articulo menciona y ta menciona den dos caminda. Specificamente, e parti di e articulo aki ta referi na e posibilidad cu Parlamento por haci pregunta na un staatssecretaris y cu e staatssecretaris mester contesta.

E funcion di un staatssecretaris no ta hancra den nos Constitucion. Niun caminda ta menciona ni hancra ki ora por tin un staatssecretaris, ken ta apunt’e y kico ta su responsabilidadnan. E articulo aki t’ey solamente pa gobernador, minister y Parlamento. Pa bin cu secretario di estado, mester cambia Constitucion. Y pa cambia Constitucion mester di dos tercera parti di Parlamento, cu ta 14 voto. Y den nomber di Partido MEP,

Prome minister a declara di no lo duna sosten na esaki, y sin Partido MEP e cambio no por pasa.

Manera cu señor Mike Eman di AVP a declara, e kier bin cu un tipo di staatssecretaris. Den esaki Prome Minister a enfatisa cu señor Eman por bin cu kico cu e kier y yam’e manera cu e kier, pero e lo no ta un staatssecretaris cu tin e autoridad manera ta e caso na Hulanda. Loke sea Eman kier introduci extra, lo ta un mini minister cu lo cobra hopi placa, haya hopi beneficio, cu gastonan di oficina, pa haci cierto tareanan cu e minister-nan apunta no tin e capacidad pa eherce nan mes. Pero no tin niun autoridad pa ley. Cu otro palabra, Mike Eman kier goberna cu 14 minister.

A resalta tambe e hecho cu e dos formadonan no ta riba un mesun linea riba e topico aki. Den nan declaracionnan duna na prensa, nan ta contradeci otro riba e topico aki.

E rol indispensable di ImSan den e sistema di salud Arubano

E desaroyonan reciente rond Instituto Medico San Nicolas (ImSan) ta preocupante. E plannan proponi, manera presenta pa señor Jacco Vroegop, director di Dr. Horacio Oduber Hospital (HOH), no ta parece ta den beneficio di Aruba y su habitantenan.

ImSan su rol indispensable den e sistema di salud Arubano

ImSan a establece su mes como un pilar den nos sistema di salud, cu un gama amplio di servicionan, incluyendo un Centro di Dialisis, Centro di Diabetes, Centro di Wowo, Departamento di Emergencia y Radiologia. E facilidadnan aki ta esencial pa nos comunidad, specialmente pa e habitantenan di San Nicolas y su alrededor. Reduci of restruccion y servicionan aki lo tin un impacto negativo directo riba e accesibilidad y calidad di cuido pa hopi hende.

Reconocemento internacional y standard halto

Na juli 2023, ImSan a ricibi e prestigioso acreditacion di Joint Commission International (JCI), convirtiendo



asina den e prome institucion na Aruba y Caribe Hulandes cu a logra e reconocimiento aki. E acreditacion aki ta confirma cu ImSan ta cumpli cu e standard internacional mas halto den area di cuido di pacient y seguridad. Ignora e logro aki y implementa plannan cu ta compromete e integridad di ImSan lo ta un paso pa atras pa e sistema di salud riba nos isla.

Efectonan pa comunidad

y economia local

ImSan ta hunga un rol crucial den e economia local di San Nicolas, duna trabou na profesionalnan medico y personal di apoyo. Reduci e servicionan of centralisa cuido na otro ubicacion lo no solamente resulta den perdida di trabou, pero tambe dañe e economia local. Ademas, pacientnan lo ta obliga pa biha distancianan mas largo pa yega na cuido medico esencial, algo cu ta un carga gran-

di pa mayornan y gruponan vulnerabel.

ImSan como institucion priva cu su propio CAO y deber financiero

ImSan ta opera como un institucion priva cu su propio acuerdo laboral colectivo (CAO) y tin prestamo pendiente cu mester wordo paga na banconan. Integrando ImSan bou di e sombre di HOH por trece desafionan financiero y operacional complejo. E

diferencianan den condicionnan laboral y obligacionnan financiero por causa tension y pone e continuidad di e cuido na riesgo.

Diferencianan cultural y mentalidad organizacional

Un otro aspecto importante ta e diferencia den cultura organizacional entre ImSan y HOH. ImSan tin un mentalidad menos “Hulandes”, cu ta traduci den un otro acercamento na cuido di pacient y procesonan interno. Forsando un integracion sin tene cuenta cu e diferencianan cultural por trece conflicto interno y un reduccion den e calidad di cuido. Den pasado, Parlamento a laga sa cu no mester bini un fusion entre e dos hospitalnan.

Conclusion

E cambianan proponi pa ImSan, manera presenta pa señor Vroegop, no ta parece ta den beneficio di nos comunidad Arubano. Ta crucial cu nos mantene y fortalece e infraestructura y servicionan existente di ImSan, pa e bienestar y salud di tur nos habitantenan.